

REGIONAL NEWS BULLETIN

Date – 01/04/2025 Time - 18:30 -18:40Hrs

HEADLINES (EVENING)

- Larsap Gen (Retd) Vijay Kumar Singh-an 'Ek Bharat Shreshtha Bharat' hnuaiah Bihar, Rajasthan leh Odisha-te State puitlinga hlankai ni 'Foundation Day' lawmna Raj Bhavan-ah a buatsaih.
- Chief Minister Pu Lalduhoman Olympic 2036 a India aiawh thei khawpa thalai talent nei tha zawncchuah an thawk mek a ti.
- Prime Minister Narendra Modia leh Chile President Boric Font te chu vawiin khan New Delhi-ah an inkawm.
- Myanmar lirnghing avanga thi zat chu 2700 chuang an ni tawh.

<><><>

EK BHARAT SHRESTHA BHARAT

Larsap Gen (Retd) Vijay Kumar Singh-an 'Ek Bharat Shreshtha Bharat' hnuaiah Bihar, Rajasthan leh Odisha-te State puitlinga hlankai ni 'Foundation Day' lawmna Raj Bhavan-ah a buatsaih a.

Larsap chuan Ek Bharat Shreshtha Bharat hmalakna chuan India rama hnam ziarang hrang hrangte a chawimawi bakah zahawmna a vawnhim sak tih sawiin, he hmalakna hian khua leh tuite inkarah inpawhtawmna leh inhriatthiamtawmna tih chak deuh deuh a tum a ni, a ti a. India ram ang ram zau leh hnam ziarang hrang hrang awmnaah inpumkhatna vawnnun tlat a pawimawh thu sawiin, State hrang hrang atanga kalkhawmin mahni hnam ziarang leh tihdan phungte an pho chhuak chuan 'Ek Bharat Shreshtha Bharat' thil tumte a takin a lantir a ni, a ti bawk.

Bihar Larsap Pu Arif Mohammed Khan leh Odisha Larsap Dr. Hari Babu Kambhampati te thuchah bakah State pahthumte chanchin tarlanna video tawi thlir ho a ni a. Dr. Akhilesh Kumar Sharma, Assistant Professor, Mizoram University leh Prof. Rabindra Kumar Mohanty, HoD, Sociology Department, Mizoram University te'n Rajasthan leh Odisha State-te chanchin tawi an sawi a. Mizoram University, NIT Mizoram leh Govt. J. Thankima College zirlaite'n lemchan, hnam lam leh zai an entir bawk a. Hemi hnu hian Larsap hian hemi puala kalkhawmte hi a kawm a ni.

<><><>

TRANSPORT DEPARTMENT

Transport Department Director Pu R. Lalrammawia'n sorkar kum kalta chhungin Aizawl khawpui chhungah lirthei nuai 2 sing 32339 ziahluh a ni, a ti.

Akashvani Correspondent Lalengmawii'n a kawmnaah he thu hi sawiin Director chuan The Motor Vehicle Amendment Act 2019 chu sorkar laipuiin kalpui tura thu a chhuah hnuah Mizoram sorkarin a buaipui nghal a ti a, hremna an rawn ti sang tih sawiin dan thar siam hmaa pawisa chawi cheng 100 chu dan tharah chawi tur cheng 500 a ni a ti a, pawikhawihna dangah cheng 1500 thleng chawi tir theih ani tih a sawi.

Director chuan Mizoram Sorkar in The Motor Vehicle Amendment Act 2019 a hman hnuah dan bawhchhiatna a tlem thu a sawi a, mipuiten dan chu hrechiana zawm theuh tur leh mi tin te himna tur ani tih hre turin an duh tih a sawi bawk.

Transport Director

Director sawi danin dan tharah helmet khum loh chu Section 194 hmanga hrem theih an nih bakah cheng 1000 chawi theih a ni a, driving license thla thum hren sak theih an ni tih sawiin kum tlinglo lirthei khalh chu dan phalloh anih avangin Nu leh Pa ten mahni fa te veng fimkhur turin a duh thu a sawi a, Lirthei kum tlinglo khalh tirtu lirthei neitu chu kum 3 thleng lung in tan tir theih a ni tih sawiin pawisa cheng 25000 chawi tir theih an nih bakah an lirthei licence kum 1 chhung cancel theih a ni a ti bawk.

<><><>

CM

Chief Minister Pu Lalduhoman Olympic 2036 a India aiawh thei khawpa thalai talent nei tha zawnchhuah hna an thawk mek a, Tuichangral Championship pawh naupang talent zawn nan hman a ni ang a ti.

Vawiina E. Lungdar Mini Sports Complex-a Tuichangral Championship 2025 a hawmnaah he thu hi sawiin Chief Minister chuan Infiamna tam tak chu eizawmna tlak a nih tawh avangin a bei tak takte tan chuan hlawhtlin theihna leh ram leh hnam chawimawina a ni a, a sorkar naupang talent nei tha te zawn chhuah a, training tha tak pea, Olympic 2036 a India aiawh thei khawpa buatsaih a tum a ni a ti.

Sports Minister Pu Lalnghinglova Hmar, Minister pawhin thusawiin, Tuichangral Naupang talent nei thate an zawng a, nakumah pawh an la zawng leh dawn a ti a, C. Lalremsanga anga Olympic khel thei nih lo tum turin thalaite a chah a ni.

TGSA huam chhungah khaw 33 an awma, kuminah hian khaw 17 an inlan ang a, a vaiin inelna chi 15 ah an nei ang.

<><><>

ALKA LAMBA

All India Mahila Congress President Pi Alka Lamba chuan Mizoram sawrkar chu mipuite mamawh, abikin hmeichhiate mamawh pek kawngah a hlawhchham hle a ni, a ti .

He thu hi vawiina Aizawl Press Club a chanchinbumite a kawmnaah sawiin Pi Alka Lamba chuan Congress sawrkarna Telengana-ah chuan Gas bur khat cheng 500 in mipuiten an lei thei a ni, a ti a. Karnataka State-ah pawh hmeichhe tan Bus chuan man a awm lo a, Mizoram sawrkar pawhin hmeichhiate tan tih theih a nei ngei a rin thu a sawi a ni.

Pi Alka Ambani chuan Manipur buaina ah pawh PM Narendra Modi in a tlawh theilo chu a hriatthiam loh thu leh State chhung buaina chu a ngaihthah hle a ni a ti a. Manipur mipuiten Prime Minister leh Union Home Minister te beisei thin mahse, anni chuan an beiseina chu engmah lovah an ngai a ni, a ti bawk.

Mizoram chu ram dang Myanmar leh Bangladesh ramri a nei a chung ramri te chu ven that anih loh avangin Mizoramah drugs a lut nasa em em a, chu chu sorkar hian tihngaihna a hrelo a ni, a ti a. Mizoram a tlawh chhan chu Congress party chhunga hmeichhia te tichak tura rawn kal a ni a ti a. Nikum September ni 15 khan Mahila Congress Foundation Day neihnaah Membership Drive an neih tawh thu leh mi nuai 5 laiin an zawm tawh thu a sawi bawk a ni.

<><><>

MUHCS

Mizoram Universal Health Care Scheme - Mipui Healthcare tia vuah chu waviin atang hian inziahlul theih hun hawn a ni a, District chhunga Health Sub Centre leh Health & Wellness Centre-ah te hawn tan a ni.

Mizoram Universal HealthCare Scheme hnuaiah hian damdawi ina inenkawlna chu package anga kalpui a ni dawn a, mahni insenso ngai lovin damdawi in luh ni atanga chhuah ni thleng, pawisa pek ngai loin dam lo te chu an inenkawl thei dawn a, an inenkawlna senso chu sorkar in a pek sak dawn a ni.

MUHCS hamthatna hi Mizoram chhunga sorkar damdawi in zawng zawngah leh he Scheme zawmtu private damdawi in, Mizoram chhung leh pawn ami ah te hman theih tura duan a ni a, MUHCS policy 2025-26 hi April ni 1, 2025 atanga March ni 31, 2026 thleng a hman theih dawn a ni.

Inziahlul theih hun hi thla thum chhung, March atanga May hawn a ni dawn a, hemi hun chhunga inziaklut hmanlote tan July thla chhung inziahlulna hun hawn a ni leh dawn a, a tlai te tan late fee, inziahlul man pangai aia zaa 50 a sang pek a ngai tawh thung dawn a ni.

“Mipui Healthcare” hi Mizoram khua leh tui zawng zawng huap tura duan a nih angin a hman thei turte chu Central scheme AB PM-JAY hman thei zawng zawng; Mizoram sawrkar hnathawk leh an dependent family member te; Mizoram sawrkar hnuaia Provisional Employee/Muster Roll te leh an chungte; Sawrkar hnathawk Pensioner-te leh an chungkua bakah tarlan zinga tel ve lo chungkua zawng zawng te a huam a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

REFUGEE

Nimin khan Lawngtlai District, Bualpui (Ng) a Raltlan te chu Mizoram Police, Assam Rifle, VC leh Young Lai Association te nen inkawmin thawhhona tha an neih theih nana tangkai chi hrang hrang sawiho a ni.

He hunah hian Bualpui NG a Raltlante awmdan tur hrilhhriat niin, Police, Assam Rifle, VC leh YLA atangin ram leh khawtlang a himzawk theih nan leh mipui leh Raltlanten thawhhona tha an neihtheih nan a tangkai chi hrang hrangte sawilan a ni a, Tun hnai khan Bualpui (Ng) ah Meth mum 56000 man a nih avang leh Myanmar atanga ruihhlo leh dan in a phalloh lakluhna kawngin a paltlang anih vangin Raltlan leh anmahni behchhana dan bawhchhiatna a thlen loh nan Raltlante hi kohkhawm an ni.

Inkawmhona ah hian Raltlanten an zawmtur hrang hrang duan a ni a, Khawchhung a, Raltlan Kenbo Bike leh lirthei dang kawlte chu khawchhungah chauh hman phal sak niin an zin dawn in Joint VC Secretary hnenah in report a lehkha lak zel tur a ni dawn a. An haw hunah lehkha kengin Joint VC Secretary hnenah in report leh tura tih an ni bawk.

Heng bakah hian Raltlan, khawchhung a In luah turten, Veng VC leh YLA te hnenah in report hmasak zel tur a ni a, Raltlan ten puipunna an huaihawt duh chuan Joint VC ah an dil hmasak tur niin Raltlan in mikhual an neih dawn in Joint VC hnenah report zel tur anih bakah Raltlan chhiarpui neih nawn leh nise an ti bawk.

(Lalnggheta Ralte PTC Lawngtlai)

<><><>

PM

Prime Minister Narendra Modia leh Chile President Boric Font te chu vawiin khan New Delhi-ah an inkawm. Hruaitu pahnihte hian India-Chile inlaichinna hrang hrang zau takin an sawidun a. He hunah hian India leh Chile te chuan Disaster Management leh Cultural Exchange lamah thawhdun an remti a ni.

PM Modia chuan thuchhuah siamin Chile chu India thian tha tak anih tu leh Latin America-a a thawhpui pawimawh tak anih thu a sawi a. Vawiina an inkawmnaah hmalakna tur thar tam tak an sawidun tih sawiin eibar zawinna lama an hlawkna tur Comprehensive Economic Partnership Agreement duang tura an inrem thu a sawi bawk a ni.

<><><>

RBI

President Droupadi Murmu chuan pawisa fai hmang loa thil leina digital payment lamah a hmahruaitu anih theih nan Reserve Bank of India chu an tangkai hle tih a sawi. Vawiina RBI kum 90 tlin lawmna Mumbai-a neihah Pi Murmu-i chuan ramchhunga lei leh hralh kawngah RBI avangin hmasawinna tam tak a thleng tih sawiin tunlai hun milin thil thar tha tak tak chin chhuah a ni a ti a. Kum 90 kalta chhungin RBI chuan zinkawng chhinchhiahtlak tak tak a paltlang tih sawiin sawrkar hmathlir leh policy nena inmil zelin a kal tih a sawi a. President Murmu-i chuan India-in zalenna kum 100-na hmang tura a inpuahchah mek laiin sum leh pai chetvelna kawngah mitin huapzo, ngaituahna thar tha leh awlsam a awm theih nan tan la turin a sawm bawk a ni.

<><><>

EARTHQUAKE

Myanmar lirnghing avanga thi zat chu 2700 chuang an ni tawh.

Myanmar sipai hotupa General Min Aung Hlaing sawidanin mitthi hi 2719 an tling tawh a. Mitthi zat hi 3000 chuang anih a rin thu a sawi a. Hliam tuar hi 4521 an tling tawh tih sawiin mi 441 chin hriatlohin an la awm tih a sawi.

Puan tawh angin Zirtawpni chawhnu khan Myanmar-ah na takin tum hnih lir a nghing a. Lirnghing hi a nat zawng tehna ritcher scale 7.7 leh 6.4 an ni a. Mandalay leh a chhehvel chu lirnghing tuar na ber an ni a. An lei hmingthang Ava Bridge chu Irrawaddy luiah a chim a, in leh bungraw tam tak a chhe bawk nia thudawn a ni. Lirnghing hi Thailand, Vietnam, Laos leh China chhimthlang lamah pawh hriat a ni a. Thailand-ah hian lirnghing avanga chhiatna thlengah mi 19 an thi tawh a ni.

India chuan Myanmar lirnghing tuarte chhawmdawl beihpui Operation Brahma chu ngawrh takin a kalpui mek a. Ei leh in leh chhanchhuahna hmanrua, damdawi leh bungrua chi hrang hrang a thawnlut mek a ni.

<> <> <>